

5 Septiembre, 2024

## DEPORTES > 24

Xogos Olímpicos  
**Judith Rodríguez  
e Damián Ramos  
logran bronces en  
esgrima e ciclismo**

**As deportistas  
galegas suman xa  
catro medallas nas  
paraolimpiadas**



Damián Ramos e Judith Rodríguez, onte. / CPE



CPE

Damián Ramos, onte na saída da contrarreloxo en París.

## A viguesa e o oleirés triunfan nos Xogos Rodríguez e Ramos logran medallas de bronce en París

Redacción | Nós Diario

O ciclista galego Damián Ramos conseguiu onte a medalla de bronce na contrarreloxo da clase C4 dos Xogos Paralímpicos de París, a terceira para a Galiza. O oleirés colgouse o metal na clase que agrupa ciclistas coa coordinación algo limitada nun lado do corpo e nas extremidades inferiores. Fíxoo tras quedar a 1:19 do francés Kevin Le Cunff, gañador con 36:46 por diante do tamén galo Gatién Le Rousseau, que quedou a 0:31 do gañador.

Ao remate, Ramos deixou claro que o 4 de setembro era "sen dúbida, o día máis feliz" da súa vida. Ademais, quixo "agradecer" este éxito a toda a xente que o apoiou despois dun 2024 "moi complicado porque un ciclo olímpico é salvaxemente difícil". Agora asegura que "o obxectivo está cumprido e non hai ninguén máis feliz ca min", reiterou este deportista.

Explicando a proba, Ramos sinala que "escoitaba pola radio que estaba fóra, mais grazas ao que o meu adestrador sabe, sempre vou de máis a menos, adoito picar como un globo e é esa capacidade de sufrimento pola que puideron outra vez resarcirme

e subir para finalmente volver ser terceiro porque sabía que nos parciais ía primeiro, segundo, terceiro ou cuarto".

### Judith Rodríguez

A esgrimista en cadeira de rodas Judith Rodríguez conseguiu onte a medalla de bronce en florete individual feminino da categoría A nos Xogos Paralímpicos de París 2024, o que supón o primeiro metal paralímpico galego e do Estado español dese deporte desde Sidney 2000. Rodríguez, que celebrou a súa medalla, manifestou tras o asalto: "Sempre soñei cun momento así, pero non me imaxinei que ía sentir tanto dentro porque ves que todo o traballado durante tanto tempo saíu hoxe".

### De la Puente a semifinais

Martín de la Puente fixo historia onte en París e clasificouse para as semifinais dos Xogos Paralímpicos ao derrotar a francés Stephane Houdet. O número tres mundial impúxose ao galo por 6-2, 4-6 e 6-1, en dúas horas e tres minutos. O rival do galego agora en semifinais será o británico Alfie Hewett, número un do mundo, mentres que na outra semifinal estarán o arxentino Gustavo Fernández e o xaponés Tokito Oda.